

**МОНГОЛ УЛСЫН ҮНДСЭН ХУУЛИЙН ЦЭЦИЙН 2023 ОНЫ
04 ДҮГЭЭР ДҮГНЭЛТИЙГ ХЭЛЭЛЦСЭН ТАЛААРХ ТӨСВИЙН
БАЙНГЫН ХОРООНЫ САНАЛ ДҮГНЭЛТ**

2023 оны 06 дугаар
сарын 22-ны өдөр

Улаанбаатар
хот

Илтгэгч нь: Улсын Их Хурлын гишүүн Г.Тэмүүлэн

Улсын Их Хурлын дарга, эрхэм гишүүд ээ,

Онцгой албан татварын тухай хуулийн зарим заалт Монгол Улсын Үндсэн хуулийн холбогдох заалтыг зөрчсөн эсэх маргааныг хянан шийдвэрлэсэн тухай Монгол Улсын Үндсэн хуулийн цэцийн 2023 оны 04 дүгээр дүгнэлтийг 2023 оны 06 дугаар сарын 19-ний өдөр Улсын Их Хуралд ирүүлсэн.

Төсвийн байнгын хороо Монгол Улсын Их Хурлын чуулганы хуралдааны дэгийн тухай хуулийн 82 дугаар зүйлд заасан журмын дагуу 2023 оны 06 дугаар сарын 21, 22-ны өдрийн хуралдаанаараа Монгол улсын Үндсэн хуулийн цэцийн 2023 оны 04 дүгээр дүгнэлтийг хэлэлцлээ.

Байнгын хорооны хуралдаанд Улсын Их Хурлын итгэмжлэгдсэн төлөөлөгч, Улсын Их Хурлын гишүүн Г.Тэмүүлэн Монгол Улсын Үндсэн хуулийн цэцийн 2023 оны 04 дүгээр дүгнэлтийн агуулгыг танилцуулсан болно.

Байнгын хорооны хуралдаанаар Үндсэн хуулийн цэцийн 04 дүгээр дүгнэлтийг хэлэлцэх үед Улсын Их Хурлын гишүүн Б.Пүрэвдорж стандартын бус, чанарын шаардлага хангахгүй шатахуунаар хэрэглэгчдэд үйлчилж байгаа нь агаарын болон орчны бохирдол, тээврийн хэрэгслийн ашиглалтад сөрөг нөлөөтэйгөөс гадна хэрэглэгчдийн эрх ашгийг зөрчиж байсан, харин хууль батлагдсан 2 жилийн хугацаанд дээрх зөрчлүүд багассаныг анхаарч зөв шийдвэр гаргах нь зүйтэй, Улсын Их Хурлын гишүүн Ж.Батжаргал Үндсэн хуулийн цэцийн Онцгой албан татварын тухай хуульд нэмэлт, өөрчлөлт оруулах тухай хуулийн зарим заалтуудыг хүчингүй болгосон дүгнэлтийг холбогдох төрийн захиргааны байгууллагын болон мэргэжлийн шинжээчдийн дүгнэлтийн дагуу үндэснийхээ эрх ашигт нийцсэн шийдвэрийг гаргахад анхаарч уг асуудлыг түр хугацаагаар хойшлуулах нь зүйтэй, Улсын Их Хурлын гишүүн Г.Амартүвшин татварын хуулиар өрсөлдөөнийг хязгаарлах нь зохисгүй тул Үндсэн хуулийн цэцийн дүгнэлтийг зөвшөөрөх, харин хуурамч шатахууны асуудалд холбогдох яам болон мэргэжлийн байгууллагууд стандартыг мөрдүүлж, хяналт тавьж ажиллах нь зүйтэй, Улсын Их Хурлын гишүүн Б.Баттөмөр онцгой албан татварыг хүний эрүүл мэндэд сөрөг нөлөө үзүүлдэг газрын тосны бүтээгдэхүүнд ногдуулахаар хуульчилсан боловч Үндсэн хуулийн цэцийн дүгнэлтээр газрын тосны дайвар бүтээгдэхүүнд татвар ногдуулахгүй болж байгаа нь Үндсэн хуулийн 1.2-т заасан тэгш байдал гэсэн зарчимтай нийцэж байгаа эсэх, мөн 2022 оны байдлаар 22 аж ахуйн нэгжид газрын тосны бүтээгдэхүүн үйлдвэрлэх тусгай зөвшөөрлийг олгосон талаар Аудитын дүгнэлтэд тусгагдсан боловч одоогоор нэг ч үйлдвэр байхгүй зөвхөн дайвар бүтээгдэхүүнийг шатахуунд хольж хуурамч шатахуун үйлдвэрлэж байгаа нь хөгжиж буй улс орнуудад хэрэглэдэг хоцрогдсон технологи бөгөөд энэ төрлийн бизнес нь

мөнгө угаах хэрэгсэл байж болзошгүйг анхаарах нь зүйтэй гэсэн саналуудыг гаргасан.


Онцгой албан татварын тухай хуулийн 4 дүгээр зүйлийн 4.1 дэх хэсгийн 4.1.5 дахь заалтад “газрын тосны үйлдвэрлэлийн дайвар бүтээгдэхүүн, керосин.” гэж, 5 дугаар зүйлийн 5.1 дэх хэсгийн хүснэгтийн 6 дахь заалтад “Газрын тосны үйлдвэрлэлийн дайвар бүтээгдэхүүн, керосин, 1 тонн”, 6 дугаар зүйлийн 6.1 дэх хэсгийн хүснэгтийн 10 дахь заалтад “Газрын тосны үйлдвэрлэлийн дайвар бүтээгдэхүүн, керосин, 1 тонн, 285 000 төгрөг” гэж заасан нь Монгол Улсын Үндсэн хуулийн Нэгдүгээр зүйлийн 2 дахь хэсгийн “... тэгш байдал, ... хууль дээдлэх нь төрийн үйл ажиллагааны үндсэн зарчим мөн.”, Тавдугаар зүйлийн 4 дэх хэсгийн “Төр нь үндэсний эдийн засгийн аюулгүй байдал, аж ахуйн бүх хэвшлийн болон хүн амын нийгмийн хөгжлийг хангах зорилгод нийцүүлэн эдийн засгийг зохицуулна.” гэснийг тус тус зөрчсөн байна гэсэн Монгол Улсын Үндсэн хуулийн цэцийн 2023 оны 04 дүгээр дүгнэлтийг хүлээн зөвшөөрөх нь зүйтэй гэж үзсэн.

Улсын Их Хурлын эрхэм гишүүд ээ,

Монгол Улсын Үндсэн хуулийн цэцийн 2023 оны 04 дүгээр дүгнэлтийг хэлэлцсэн талаарх Төсвийн байнгын хорооны санал, дүгнэлтийг хэлэлцэн шийдвэрлэж өгөхийг Та бүхнээс хүсье.

Анхаарал тавьсанд баярлалаа.

ТӨСВИЙН БАЙНГЫН
ХОРООНЫ ДАРГА



Г.ТЭМҮҮЛЭН